



## Morele herlewing van die samelewing na 'n dekade van staatskaping

**Na tien grou winterjare van staatskaping wil dit vandag lyk asof lente in ons Suid-Afrikaanse samelewing aangebreek het. Daar is tekens van nuwe moontlikhede, van die bot en uitgroei van ons land en sy mense.**

Maar om werklik vars, groen blare uit te stoot, is die morele hernuwing van ons samelewing noodsaaklik. Daarom is met 'n konferensie aan die einde van September vanuit gereformeerde-teologiese hoek saam nagedink oor die tema: *Die morele herlewing van die Suid-Afrikaanse samelewing na 'n dekade van staatskaping.*

Die luister ... die nadink ... die kruisbestuiging van denke ... het my ten minste die volgende gedagtelyne laat herkou:

- As gelowiges is dit goed om eers eerlik na onself te kyk en te vra: Wat het ons gedurende die tien koue staatskapingsjare gedoen? Waar en hoe en hoekom het ons as gelowiges ons land en sy mense gefaal?
- Maar as gelowiges is dit ook nodig dat ons as deel van die Suid-Afrikaanse samelewing nie deur die krisissituasie verlam sal word nie. Elke krisis, ook die staatskapingkrisis, skep geleenthede om vars en nuut te dink, te werk.
- As gelowiges saam, as kerk van die Here Jesus, mag ons krities-solidêr in ons samelewing leef.
- Soos die profete van ouds, mag ons die moed hê om teen die konings en teen die heersende gedagterigtings van ons tyd in te gaan. Maar dan is dit nodig om seker te maak dat ons nie deel van die "establishment" is en so in ons eerlike en nodige getuienis lamgelê word nie!
- As gelowiges staan ons egter ook nie net teenoor die samelewing nie. Néé, ons is in die wêreld en behoort elkeen self en almal saam reg en geregtigheid in ons omgewing te bevorder.
- Daarom kan ons nie as gelowiges, as kerk – soos ons so dikwels in die verlede gedoen het – net een keer getuig en dan terugstaan en stilbly nie. As ons getuienis op dowe ore val, gaan ons kreatief moet werk om die waardes van die Skrif in ons samelewing in te dra, om soos suurdeeg in ons samelewing betrokke te wees en te bly.
- Ons sal daarom ook moet besef dat moraliteit nie deur programme georganiseer kan word of deur wette en reëls afgedwing kan word nie. Wel kan ons 'n invloed op ander uitoefen deur in hul lewe teenwoordig te wees en doelbewus die nuwe lewe te bevorder.
- Uiteindelik is dit ononderhandelbaar dat ons as gelowiges self die houvas van korrupsie sal breek. In ons eie lewe en in die lewe van ons medegelowiges sal ons dringend daarnatoe moet werk om los te kom van korrupsie in die klein. Selfs by Christene het dit immers 'n algemeen-aanvaarde gebruik geword om 'n R100-noot saam met my ID vir die verkeerspolisievrou te gee wanneer sy my vir 'n oortreding aftrek! En as Christene reken ons ook maar die sogenaamde 10%-kommissie in wanneer ons vir staatskontrakte tender. Juis hiervan sal ons eers self moet loskom!

Soos ek hierdie gedagtes herkou, bid ek dat ons Here my en jou as Christene in ons land genadig sal wees om by te dra tot die morele herlewing. Mag ons deur die krag van sy Gees die nuwe-lewe-tyd, die nuwe-moontlikhede-tyd, die nuwe-hoop-tyd uitkoop!

Teken in om 'n skakel na blitspos te ontvang

Nuus, berigte en kort kommentaar (uiters 100 woorde) aan produksie@nhk.co.za

Webblad van die Hervormde Kerk [www.nhka.org](http://www.nhka.org)

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

## Lief en leed



Oudl Frits Smit

- **Oudl Frits Smit** van Kaapstad (kassier en jarelange lid van die Kommissie van die AKV) is reeds 'n geruime tyd in die hospitaal. Sy dogter, Adele Strydom, het laat weet dat hy die afgelope vier weke in die intensiewesorgeenheid van Netcare UCT is. Hy word behandel vir akute pankreatitis, asook nierversaking, en reageer positief op die behandeling. Ons bid hom spoedige beterskap toe.
- **Die volgende predikante verjaar tot 15 Oktober 2021, en word hartlik geluk gewens:**
  - Donderdag 7 Oktober: Dr PJ (Paul) de Beer (82) (emeritus) en ds S (Steve) Oxton (34) (Wapadrant)
  - Vrydag 8 Oktober: Prof JD (John) Gericke (80) (emeritus/Setlaars) en dr WA (Willie) Strydom (60) (Eikenhof/Johannesburg-Suid)
  - Saterdag 9 Oktober: Ds LJ (Sakkie) Meyer (82) (emeritus) en prof WA (Wim) Dreyer (63) (UP/SRT)
  - Dinsdag 12 Oktober: Di M (Milankie) van der Walt (58) (Namib-Suid), BC (Barrie) Oberholzer (57) (Grootfontein/Tsumeb) en GDJ (Gert) Macdonald (52) (Nelspruit)

## Gemeentes en bediening

- **Beoogde komitee vir advies oor voorgestelde wetgewing.** Gemeentes en predikante nader dikwels die Kommissie van die AKV oor die Hervormde Kerk se standpunt wanneer die owerhede nuwe wetgewing oorweeg of voorstel. Die Kommissie van die AKV en die personeel van die Sinodale Dienssentrum beskik in die meeste gevalle nie oor die nodige kundigheid om gemeentes daarvoor te adviseer nie, en moet dan op enkele kundiges se knoppie druk om kommentaar te lewer. Dit gebeur dikwels dat hierdie kommentaar binne 'n kort tydsbestek gelewer moet word, wat dit uiteraard vir die betrokke kundiges baie moeilik maak. Daarom versoek ons gemeentes en predikante vriendelik **om regsgeleerdes in u gemeente te nomineer** wat die Kerk met advies oor konsepwetgewing kan bystaan wanneer die situasie daarna vra. Indien ons 'n **Kernkomitee: Kerk en Owerheid** kan saamstel wat die Kommissie van die AKV kan adviseer, kan ons die druk op enkele persone verlig en verseker dat die Kerk steeds goed ingeligte en weldeurdagte kommentaar lewer en so ook aan gemeentes die nodige leiding kan gee. U word vriendelik versoek om die name en kontakligting van bekwame en gewillige regsgeleerdes **teen Vrydag 29 Oktober 2021** na [karen@nhk.co.za](mailto:karen@nhk.co.za) te stuur.
- **VAKANTE WERKRUIMTE: Gemeente Rustenburg-Suid.** Aansoeke word ingewag van 'n gelegitimeerde predikant van die Nederduitsch Hervormde Kerk vir die werkruiimte van hierdie gemeente wat op 1 Desember 2021 vakant sal raak.

### Gemeenteprofiel

Gemeente Rustenburg-Suid is een van vier Hervormde gemeentes in Rustenburg en bestaan sedert 1957. Die sieletal van die gemeente is sowat 850, waarvan 550 belydende lidmate is. Die ouderdomsgroepering van die gemeente is redelik verspreid met die grootste aantal lidmate in die groep bo 40. Daar is twee tehuse vir bejaardes binne die gemeentegrense wat nie deur die gemeente bedryf word nie, maar waar 'n aantal lidmate woonagtig is. Die gemeente beskik oor 'n doelmatige kompleks bestaande uit 'n kerkgebou, saal met kombuis en kategeselokale. Die gemeente beskik ook oor 'n ingerigte slaghuis op die kerkterrein wat op 'n semi-voltydse basis bedryf word ter stywing van fondse. Die gemeente beskik oor 'n ruim vierslaapkamerpastorie met 'n swembad en gevestigde tuin op die kerkterrein.

### Profiel van die ideale leraar

Moet verkieslik in die ouderdomsgroep 30 tot 50 val of so na moontlik daaraan. Moet die bediening in die gemeente dinamies maar Skrifgetrou en verstaanbaar vir alle ouderdomsgroepe kan hanteer. Moet vernuwend en sinvol met die liturgie in eredienste omgaan. Moet 'n aanvoeling vir gemeentesang asook musiek in eredienste hê. Moet sinvol as deel van 'n bestuurspan kan funksioneer. Sy of haar gade moet aktief by die gemeente se wel en wee betrokke wees. Daar kan van die aansoeker verwag word om tydens die

gemeente se vakante tydperk 'n erediens in die gemeente teen die normale vergoeding waar te neem.

### Posbeskrywing

Dit is 'n voltydse werkkruimte met verantwoordelikhede soos in die Kerkorde omskryf. Vergoeding, reiskoste, mediese fonds en pensioen sal volgens die voorgeskrewe skale en die Kerkorde se voorskrifte hanteer word met inagneming van die leraar se aantal jare diens. Daar sal van die leraar verwag word om die pastorie op die kerkterrein gratis te bewoon en gratis munisipale dienste en 'n landlyntelefoon sal verskaf word. 'n Huishulp is beskikbaar wat twee dae per week, op die koste van die Kerkraad, tot die pastorie se beskikking is.

### Aansoeke

**Aansoeke sluit op 16 Oktober 2021.** Aansoeke moet vergesel wees van 'n verkorte CV en gestuur word aan die Sekretariële Beampte, [nhrbsuid@gmail.com](mailto:nhrbsuid@gmail.com). Verdere inligting kan bekom word by Dawie Smith (082 484 4955). Die Kerkraad behou die reg voor om nie een van die aansoekers te beroep nie, of 'n leraar wat nie aansoek gedoen het nie, uit te nooi om 'n CV aan die Kerkraad te stuur vir oorweging vir die vulling van die vakature.

- **VAKANTE WERKRUIJTE: Samewerkende kerke in Harare.** Die NHKA en die NGK in Harare funksioneer sedert 2019 as een gemeente. Dit is 'n tipies stedelike gemeente en bestaan hoofsaaklik uit ouer persone. Daar is ook lidmate wat buite die stedelike gebied woon. Die **vastetermynpos vir drie jaar** kan met wedersydse instemming verleng word. Aansoeke word ingewag van 'n **tweetalige predikant** wat gelegitimeer is in die Hervormde Kerk of die NG Kerk (eredienste word om die beurt in Afrikaans en Engels gelei). Aangesien die skoolopleiding in Zimbabwe geweldig duur is, moet predikante verkieslik nie skoolgaande afhanklikes hê nie.

Die **vergoedingspakket** beloop 'n leefbare inkomste in Zimbabwe, plus gratis verblyf in 'n gemeubeleerde pastorie (insluitende sekuriteit, telefoon, data, water, ligte en 'n bediende) en gratis gebruik van 'n gemeentevervoertuig.

**Aansoeke** moet vergesel wees van 'n verkorte CV met vermelding van die kontakbesonderhede van twee referente, en moet gestuur word na [njssteenekamp@gmail.com](mailto:njssteenekamp@gmail.com). Vir meer inligting, kontak die konsulent van die Hervormde Kerk, ds Nicolaas Steenekamp, by 073 279 3315 (RSA); of NHKA oudl Rinus Grau by +263 71 261 1536; of NGK oudl Deon Theron by +263 77 224 6233.

## Vergaderings

- Dinsdag 12 Oktober: TOIBO Dagbestuur  
TOIBO Kantoorvergadering  
Kuratorium
- Vrydag 15 Oktober: Moderamen

## Kerklike publikasies



**Bybelse Dagboek / Almanak 2022**  
R200 (versending uitgesluit)

Kry belangrike inligting oor die Hervormde Kerk én 'n inspirerende Bybelse dagboek in een omslag

**Beperkte oplaag** – bestel by [boekwinkel@nhk.co.za](mailto:boekwinkel@nhk.co.za)

- Gemeentes word versoek om die besonderhede te verskaf van enige **emerituspredikante en/of predikanteweduwees** in hul geleedere, sodat hul komplimentêre eksemplare van die *Almanak/Bybelse Dagboek* saam met die res van die gemeente se bestelling versend kan word. Dui die bestellings asseblief apart aan, byvoorbeeld gemeente x-aantal, emeriti/predikanteweduwees y-aantal. Stuur die besonderhede asseblief aan mev Sarie Roux by [boekwinkel@nhk.co.za](mailto:boekwinkel@nhk.co.za).
- Daar is nog 'n groot hoeveelheid eksemplare beskikbaar van die huidige **Almanak/Bybelse Dagboek (2021)**, teen die **verlaagde prys van R100 elk (versending uitgesluit)**. Die oorspronklike prys was R190 per eksemplaar. Gemeentes kan gerus oorweeg om daarvan aan te koop vir verspreiding aan onder meer tehuise vir bejaardes. Die kosbare boodskappe in die *Bybelse Dagboek* is immers tydloos! Kontak mev Sarie Roux by die Sinodale boekwinkel, by [boekwinkel@nhk.co.za](mailto:boekwinkel@nhk.co.za) of 012 322 8885 x3025, om te bestel.



## Toerusting

Maar 'n takkie sal spruit uit die stomp van Isai,  
en 'n loot uit sy wortels sal vrugte dra (Jes 11: 1)




## Lesing op versoek van die HTK

### Hoe het die 4de Industriële Revolusie die teologie verander?


- Prof Jaco Beyers
- 19 Oktober 2021 om 09:00 en 19:00

Zoomskakel: <https://us02web.zoom.us/j/4502811960?pwd=dWRGZHpYeIBrWFpIajQrQVV4Z0Z0cydz09>  
Wagwoord: HTK

- Staan u dikwels voor 'n getraumatiseerde lidmaat en wens u weet hoe om werklik van hulp te wees? Kom woon 'n **TIR (Traumatic Incident Reduction) Werkswinkel** by en kom leer iets van Jesaja 50: 4: *Die Here my God het my geleer om die regte woorde te gebruik sodat ek dié wat moeg is, kan moed inpraat. Elke môre laat Hy my opnuut weer luister.*  
**Datum: 16-19 Oktober**  
Plek: Pretoria  
Koste: R5 000  
Besoek [yvonneretief.weebly.com](http://yvonneretief.weebly.com) of kontak Yvonne by [retief.yvonne@gmail.com](mailto:retief.yvonne@gmail.com).




Departement van Teologie  
in samewerking met die



HEREDERIEËRSCH HERVOORDE KERK VAN AFRIKA

## Diploma in Bediening Deeltydse studies

Ten volle geakkrediteerde kwalifikasie: NQF Vlak 6  
SAQA ID: 96454; aantal krediete 379; 5 jaar deelyds



**Toelatingsvereistes**  
Nasionale Senior Sertifikaat met toegang tot diplomastudies, of gelykwaardige kwalifikasie

“Hierdie kwalifikasie is veral geskik om lidmate, kerkraadslede en kategete toe te rus vir dienswerk binne en buite die kerk.”

**Inskrywings vir Januarie 2022 open 1 Oktober 2021**

*Maak 'n verskil in die Koninkryk van God*

Navrae: Ds Bouwer Serfontein  
E-pos: [ministry@skillspro.co.za](mailto:ministry@skillspro.co.za)  
Selnommer: 082 339 7854

## Fondsinsamelings

- **Gemeente Oos-Londen: Word 'n affiliaal van Nguni Gifts**  
Verdien 2- tot 7%-kommissie  
Befonds jul gemeente se bediening deur verwysings  
Stuur 'n e-pos of WhatsApp-boodskap om jul gemeente aan te sluit  
[larry@nguni-gifts.co.za](mailto:larry@nguni-gifts.co.za)  
WhatsApp 072 020 8911

## 'n Gedig

### Huisgenoot

Lank nadat dit geen sin meer had nie,  
het ek na 'n kort of lang afwesigheid  
by elke tuiskoms dit nog gedoen –  
my oë werktuiglik neergeslaan  
omdat ek geglo het sy sou daar wees:  
soos 'n miniatuur jagluiperd  
op volle vaart trapaf na my op pad  
of met die blouste blou oogopslag  
en haar aangebore sierlike skoonheid –  
'n klein standbeeldjie op wag.

Die lewe is 'n tydelike verblyf  
in vele woninge  
en as die dood 'n deurgang is  
na die Huis van die Vader  
en nie na 'n onbewoonde ruim nie,  
weet ek dat wanneer ek  
oor die laaste drumpel tree,  
ek af sal kyk.

**Lina Spies**

(Uit: *Tydlose gety*, 2010)

## Barmhartigheid

- **Rata Maatskaplike Dienste se *Drive for a Child*-gholfdag** vind op **26 Oktober 2021** by Silver Lakes-gholfbaan in Pretoria plaas. Die fondse wat ingesamel word, is ten bate van elke kind wat tans deur Rata ondersteun en gehelp word.  
**Koste:** R4 400 (Vierbal) – gholfskarretjies, halfweghuisete, aandete, *goodie bags* ingesluit  
**Putjieborg:** R2 500  
**Vierbal met putjieborg ingesluit:** R5 500  
**Navrae:** Charmaine Fourie [charmaine@rata.org.za](mailto:charmaine@rata.org.za) / 071 684 7796
- **NHSV Beurse en lenings 2022.** Die NHSV beskik oor beurse/lenings vir studente in enige studierigting. Slegs lidmate van die Nederduitsch Hervormde Kerk kwalifiseer vir die toekennings. Die aansoekvorm kan *hier* afgelaai word. **Die sluitingsdatum vir aansoeke is 15 November 2021.**
- **Athalia Uitreik in Bloemfontein**  
**Verblyf vir en versorging van bejaardes en gestremdes**  
Enkel- en deerkamergeriewe in 'n huislike atmosfeer  
Verblyf met 3 etes ingesluit  
Verblyf sonder versorging R1 700 per maand  
24-uur-versorging onderhandelbaar  
(maksimum R8 000 per maand deerkamer)  
Navrae: 079 826 6363 / 084 023 0315 / 051 522 6089  
[navrae@athalia.co.za](mailto:navrae@athalia.co.za)  
[www.athalia.co.za](http://www.athalia.co.za)
- **Machteld Postmus-behuisingskompleks vir bejaardes** in Brooklyn, Pretoria, het 'n **tweeslaapkamer-woonregeenheid** beskikbaar by Frans Boshoff: Dit is Woonstel 3 teen R485 000. Kontak mev Hannelie Fourie by 012 325 1857 x216 vir meer inligting.
- **Louis Trichardt-behuisingskompleks vir bejaardes** in Danville, Pretoria, bied kamergeriewe met drie etes per dag teen R4 435 per maand. Vir meer inligting, kontak mev Vicky Muller by 012 386 5310.



- **Ons Tuis (Andries Marié Oosthuizen) in Parys** het tans plek beskikbaar in die tehuise vir versorging van verswakte bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.

- **Seniordal-aftreeoord**

Kieserstraat 126, Rietondale

Een enkelwoning te koop teen R510 000

Een eenslaapkamerwoning te koop teen R515 000

Een 1½-slaapkamerwoning te koop teen R520 000

Een tweeslaapkamerwoning te koop teen R560 000

Een tweeslaapkamerwoning te huur teen R6 500 per maand

Navrae: Beulah du Plessis by 082 847 9544

[Seniordalpta@gmail.com](mailto:Seniordalpta@gmail.com)



## Betaalde advertensies in hierdie nuusbrieff

Die koste vir advertensies is **R250 per plasing (BTW ingesluit)**. Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.

Meer besonderhede oor advertensies kan aangevra word van [produksie@nhk.co.za](mailto:produksie@nhk.co.za).

## Gebed vir die week

Liewe Heer,  
vandag bring ek my kind na U.  
Asseblief, leer my hoe om 'n ouer te wees  
vir hierdie kosbare geskenk wat U my gegee het.  
Help my om die beste moontlike ouer te wees.  
Ek bid dat u Heilige Gees my sal leer,  
dat u wysheid my sal lei  
en dat u liefde my sal aanraak.  
Maar Heer, belangrikste van alles:  
Ek gee vir U hierdie kind.  
Asseblief, maak hierdie kosbare kind  
'n mens na u eie hart.

[godtube.com/inspirations/a-prayer-for-my-children.html](http://godtube.com/inspirations/a-prayer-for-my-children.html)

(Afrikaanse weergawe: Tessa Oppermann)